



Na osnovu člana 17. stav (1) i člana 44. stav (1) Zakona o Visokom sudskom i tužilačkom vijeću Bosne i Hercegovine („Službeni glasnik Bosne i Hercegovine”, br. 25/04, 93/05, 48/07, 15/08, 63/23, 9/24 i 50/24), a u vezi sa članom 61b. i 62. Poslovnika Visokog sudskog i tužilačkog vijeća Bosne i Hercegovine („Službeni glasnik Bosne i Hercegovine”, br. 55/13, 96/13, 46/14, 61/14, 78/14, 27/15, 46/15, 93/16, 48/17, 88/17, 41/18, 64/18, 12/21, 26/21, 35/21, 68/21, 1/22, 26/23, 83/23, 9/24, 27/24, 72/24), Visoko sudsko i tužilačko vijeće Bosne i Hercegovine (u daljem tekstu: Vijeće), u sastavu, sudija Halil Lagumdžija, predsjednik Vijeća, sutkinja Aleksandra Obradović i sutkinja Sanela Gorušanović - Butigan, potpredsjednice Vijeća, te tužilac Sanin Bogunić, tužiteljica Bojana Jolović, tužiteljica Snježana Petković, advokatica mr. Duška Bogojević, sudija Mustafa Šabić, tužilac Saša Sarajlić, sutkinja Ljiljana Bošnjak - Glizijan, advokat dr. sc Davor Martinović, tužiteljica Željka Fabić, advokatica Elma Veledar Arifagić i sudija Velimir Ninković, na sjednici održanoj 05. i 07.02.2025. godine, donijelo je

R J E Š E N J E

o imenovanju predsjednika Kantonalnog suda u Sarajevu

- I. Za predsjednika Kantonalnog suda u Sarajevu imenuje se **Jasenska Potogija**, na mandat od šest (6) godina
- II. Datum stupanja na dužnost imenovane Vijeće će odrediti posebnom odlukom.

O b r a z l o ž e n j e

Na osnovu člana 36. Zakona o Visokom sudskom i tužilačkom vijeću Bosne i Hercegovine (u daljem tekstu: Zakon o VSTV-u BiH) i člana 33. i 34. Poslovnika Visokog sudskog i tužilačkog vijeća Bosne i Hercegovine (u daljem tekstu: Poslovnik VSTV-a BiH), Vijeće je na internet stranici dana 07.11.2024. godine objavilo javni konkurs pod brojem: 04-07-3-4035-1/2024, kojim je oglašena pozicija predsjednika Kantonalnog suda u Sarajevu.

Nakon provedene konkursne procedure, nadležno podvijeće je u skladu sa članom 61b. stav. (1) Poslovnika VSTV-a BiH za predsjednika Kantonalnog suda u Sarajevu predložilo kandidate na rang listi pod rednim brojem 1, 2 i 3 sa liste uspješnih kandidata, i to Dženanu Brković, Jasenku Potogija i Anabelu Bogdan Krstović, koji na sjednici Vijeća izlažu program rada koji su ranije dostavili i izložili komisiji za obavljanje razgovora.

U skladu sa članom 61b. st. (3), (4) i (5) Poslovnika VSTV-a BiH, nadležno podvijeće dostavilo je Vijeću obrazložene prijedloge za sva tri kandidata sa rang liste pod rednim br. 1, 2 i 3, sa bodovima koje su kandidati ostvarili u konkursnoj proceduri i njihovim programom rada, te rang listu kandidata.

Nakon izlaganja prijedloga podvijeća, sva tri predložena kandidata su na sjednici Vijeća, u skladu sa članom 61b. st. (6) i (7) Poslovnika VSTV-a BiH, izložili svoj program rada, prema redoslijedu koji su ostvarili na rang listi.

Razmatrajući zaključenu rang listu kandidata i utvrđeni broj bodova, kao rezultat ocjenjivanja svih kriterija propisanih Zakonom o VSTV-u BiH i Poslovnikom VSTV-a BiH, te na osnovu uspjeha postignutog u konkursnoj proceduri i izlaganja programa rada, Vijeće je primjenjujući odredbe člana 61b. st. (8), (9) i (10) Poslovnika VSTV-a BiH, a nakon što kandidatkinja na rang listi pod rednim brojem 1 nije

dobila većinu glasova potrebnu za imenovanje, odlučilo da za predsjednika Kantonalnog suda u Sarajevu imenuje kandidatkinju na rang listi pod rednim brojem 2 Jasenku Potogija, koja od 01.04.2019. godine obavlja dužnost sudije Kantonalnog suda u Sarajevu.

Prethodno imenovanju na dužnost sudije Kantonalnog suda u Sarajevu, imenovana kandidatkinja je u periodu od 2008. g. do 2019. g., obavljala dužnost sudije u Općinskom sudu u Sarajevu, a u periodu od 2006. g. do 2008. g. u istom sudu obavljala je poslove stručnog saradnika. U periodu od 2002. do 2006. g. obavljala je poslove pipravnika i stručnog saradnika u Trgovinskom sudu u Beogradu.

Vijeće je nakon ocjene stručnosti kandidatkinje, sposobnosti pravne analize, komunikativnosti i sposobnosti prezentacije, sposobnosti kandidatkinje da odgovorno, nezavisno i nepristrasno obavlja funkciju sudije, uzimajući u obzir, između ostalog, dosadašnje radno iskustvo kandidatkinje, profesionalnu nepristrasnost i ugled, ponašanje van posla, edukaciju i usavršavanje, objavljivanje stručnih i naučnih radova, te druge aktivnosti u struci, rukovodne vještine i iskustvo, sposobnost upravljanja ljudskim potencijalima i ocjene kriterija podobnosti, ocijenilo da imenovana kandidatkinja u potpunosti ispunjava uslove za imenovanje propisane u članu 43. Zakona o VSTV-u BiH.

Kada je u pitanju broj ostvarenih bodova, Vijeće je imalo u vidu da je imenovana kandidatkinja u toku konkursne procedure, u pogledu bodova za kriterij stručnosti i sposobnosti pravne analize ostvarila ukupno 100 bodova od mogućih 100 bodova, dok je na razgovoru pred nadležnom komisijom Vijeća u pogledu drugih kriterija ostvarila ukupno 27,9 bodova od mogućih 30 bodova, što ju je u konačnici rangiralo na drugom mjestu rang liste kandidata sa ukupno ostvarenih 127,9 bodova od mogućih 130 bodova.

Kriteriji stručnosti i sposobnosti pravne analize imenovane kandidatkinje, koja je nosilac pravosudne funkcije, utvrđeni su na osnovu ocjene rada za posljednje tri godine za koje je ocijenjena, i to za 2021. g., 2022. g. i 2023. g., a računajući do dana isteka roka za podnošenje prijave po navedenom konkursu.

Na osnovu ocjena rada za 2021. g., 2022. g. i 2023. g., odnosno ocjena 5, 5 i 5, utvrđeno je da je kandidatkinja za navedene tri godine za koje je ocijenjena ostvarila prosjek od 5. Prema odredbama člana 56. stav 2. Poslovnika VSTV-a BiH, njenoj prosječnoj ocjeni rada za prethodne tri godine koja iznosi 5 dodijeljen je ekvivalentan broj bodova koji se koristi u konkursnoj proceduri od 100 bodova.

Ostali kriteriji, koji se odnose na sposobnost kandidatkinje da odgovorno, nezavisno i nepristrasno obavlja funkciju za koju se prijavila, profesionalne nepristrasnosti i ugleda, te ponašanja van posla, dosadašnjeg radnog iskustva kandidatkinje, edukacije i usavršavanja, objavljivanja stručnih i naučnih radova, te drugih aktivnosti u struci, komunikativnosti, rukovodnih vještina i iskustva, te sposobnosti upravljanja ljudskim potencijalima utvrđeni su na razgovoru pred nadležnom komisijom Vijeća, kojom prilikom je svaki član komisije nezavisno bodovao kriterije, kako je to propisano u čl. 54., 54b., 54d., 54e. i 54f. Poslovnika VSTV-a BiH, pri čemu je kandidatkinja po tom osnovu u konačnici ostvarila ukupno 27,9 bodova. Konačan broj bodova koje kandidat ostvari na razgovoru predstavlja prosjek zbira ocjena po kriterijima koji se ocjenjuju na razgovoru.

Pored ukupnog broja ostvarenih bodova, na osnovu kojih je kandidatkinja u skladu sa čl. 59a. stav (2) tačka b) Poslovnika VSTV-a BiH stekla uvjete za predlaganje i imenovanje na poziciju predsjednika kantonalnog suda, Vijeće je vodilo računa o okolnostima koje su relevantne za procjenu podobnosti iz člana 48a. Poslovnika VSTV-a BiH, ocijenivši da ne postoje okolnosti koje izazivaju sumnju u pogledu podobnosti kandidatkinje za poziciju za koju se prijavila.

Imenovanje navedene kandidatkinje, u odnosu na prvorangiranu kandidatkinju koja nije dobila potrebnu većinu glasova članova Vijeća, pored prethodno navedenih okolnosti, opredjelio je i detaljan Program rada za predsjednika Kantonalnog suda u Sarajevu za mandatni period koji je kandidatkinja dostavila u toku konkursne procedure i izložila tokom obavljenog razgovora pred nadležnom komisijom Vijeća, kao i na sjednici Vijeća.

Nakon izlaganja programa rada i datih odgovora kandidata na postavljena pitanja pojedinih članova Vijeća u vezi sa izloženim programom rada, Vijeće je nakon sveobuhvatne rasprave konstatovalo da se u konkretnom slučaju radi o približno jednakim kandidatima sa uspješnom profesionalnom karijerom.

U takvim okolnostima, neposredan kontakt sa imenovanom kandidatkinjom, kako pred nadležnom komisijom Vijeća za obavljanje razgovora tako i pred Vijećem kao cjelinom, pokazao je na strani imenovane kandidatkinje prednost u odnosu na prvorangiranu kandidatkinju koja je na rang listi ostvarila neznatno veći broj bodova. Obzirom na činjenicu da je imenovana kandidatkinja ostvarila manji broj bodova (127,9) od kandidatkinje na rang listi pod rednim brojem 1 koja je ostvarila 128,3 bodova, Vijeće je zaključilo da je takav položaj kandidata na rang listi posljedica male razlike u ukupno ostvarenim bodovima (0,4 boda), koja u konkretnom slučaju ne ukazuje na stvarnu razliku u kvaliteti u korist kandidatkinje pod rednim brojem 1 sa rang liste.

Imenovana kandidatkinja je kroz izlaganje programa rada pred Vijećem, za razliku od prvorangirane kandidatkinje, ostavila dojam da se radi o kandidatkinji od koje se u većoj mjeri može očekivati da će uspješno, stručno i savjesno obavljati dužnost predsjednika suda.

Osnov za takvu tvrdnju jeste, između ostalog, detaljno i uvjerljivo izlaganje prijedloga strateških ciljeva, ciljanih rezultata i predloženih mjera koje kandidatkinja namjerava ostvariti u svrhu unapređenja rada institucije, odnosno Kantonalnog suda u Sarajevu, zatim mogućih prepreka i strategija za njihovo prevazilaženje, te načina rukovođenja sudom.

Vijeće je cijeno da je imenovana kandidatkinja u potpunosti prepoznala osnovne nedostatke suda u kojem radi, a koji se prije svega ogledaju u nedostatku unutrašnje i vanjske komunikativnosti, kao i nedovoljne transparentnosti i neiskorištenosti kapaciteta suda i zaposlenih u sudu, sudija i nesudskog osoblja i za sve to ponudila je konkretna rješenja. Dala je najjasnije i najsažetije odgovore, definisala je stanje i dala jasna usmjerenja u kojem pravcu treba da ide navedeni sud. Kroz izlaganje programa rada pokazala je da se radi o osobi od autoriteta, koja može odgovoriti svim zadacima i izazovima koji se postavljaju pred ovako značajnu rukovodnu poziciju.

Iz dostavljenog programa rada i prezentacije istog pred komisijom za obavljanje razgovora i pred Vijećem kao cjelinom, kandidatkinja pod rednim brojem 1 na rang listi pokazala je da razumije ulogu i namjeru suda u ostvarivanju ciljeva zbog kojih je osnovan. Međutim evidentno je da ne poznaje u potpunosti stanje u sudu i personalne kapacitete za izgradnju tima. Kandidatkinja dužnost sudije Kantonalnog suda u Sarajevu obavlja od 01.07.2024. godine, dakle posljednjih 7 mjeseci, a cijeneći njeno izlaganje pred Komisijom za obavljanje razgovora i odgovore na postavljena pitanja pred Vijećem proizilazi da ne poznaje kapacitete suda kao imenovana kandidatkinja koja dužnost sudije navedenog suda obavlja od 01.04.2019. godine.

Dakle, imenovana kandidatkinja za razliku od kandidatkinje pod rednim brojem 1 na rang listi bolje poznaje lične mogućnosti i afinitete svakog sudije, dala je konkretne prijedloge kako bi uredila i poboljšala rad tog suda, jer je upoznala kapacitete nosilaca pravosudnih funkcija, te je za očekivati da može napraviti bolju preraspodjelu poslova unutar tog suda.

Uzimajući u obzir navedeno, Vijeće je ocijenilo da je imenovana kandidatkinja u potpunosti ispunila zakonom propisane uslove, kao i druge kriterije koji se cijene prilikom izbora kandidata, kako bi bila imenovana na poziciju predsjednika Kantonalnog suda u Sarajevu.

Kandidatkinja se na dužnost predsjednika suda, u skladu sa članom 27. stav (2) Zakona o VSTV-u BiH imenuje na mandat od 6 (šest) godina.

Shodno odredbama člana 44. stav (6) Zakona o VSTV-u BiH, u slučaju pokretanja upravnog spora za ovu poziciju se odgađa stupanje na funkciju imenovanog kandidata, dok se ne okonča sudski postupak.

U skladu sa odredbama člana 2. Zakona o izmjeni Zakona o Visokom sudskom i tužilačkom vijeću Bosne i Hercegovine („Službeni glasnik BiH“ br. 50/24) sva lica imenovana u periodu od 23. marta 2024. do 28. februara 2025. mogu stupiti na dužnost, a provjera njihovih izvještaja o imovini i interesima bit će izvršena nakon uspostavljanja Odjela za provođenje postupka po izvještajima. Ako ishod provjere bude negativan, bit će pokrenut disciplinski postupak u skladu sa pravilima iz člana 86d. st. (3), (4) i (5).

Ovo rješenje će biti objavljeno na internet stranici Vijeća, shodno članu 44. stav (1) Zakona i članu 62. stav (4) Poslovnika VSTV-a BiH, uz naznaku datuma objave od kojeg počinje teći rok za podnošenje tužbe.

Imajući u vidu sve iznesene razloge, Vijeće je odlučilo kao u izreci ovog rješenja.

Uputa o pravnom lijeku: Protiv ovog rješenja može se pokrenuti upravni spor pred Sudom Bosne i Hercegovine u roku od osam dana od dana objavljivanja rješenja o imenovanju na internet stranici Vijeća.

Broj: 04-07-3-720-1/2025
Datum: 05.02.2025. godine

